

PAGTULON-AN 9 – ANG DALAN SA SAAD MITIPAS PAINGON SA EGIPTO

Genesis 37 - 50

TEMA: Paghatag ug panglantaw sa kasaysayan sa Israel nga may kalabutan kang Cristo Jesus.

Nakalantaw ka na ba sa teleskopyo, ang instrumento sa pagtan-aw ug mga butang nga anaa sa halayo. Kon nakahimo ka na, nakita na nimo ang halayo. Karon atong himamaton ang usa ka tawo sa DALAN SA SAAD; kansang kinabuhi sama sa paglantaw sa teleskopyo. Pinaagi sa iyang kasinatian atong makita sa halayo diha sa DALAN SA KINABUHI ngadto sa panahon ni Cristo Jesus ug lampas pa gani ngadto sa panahon sa gingharian. Atong matawag kini nga tawo nga tipo o hulad, kay siya usa ka hulagway sa mga panghitabo sa umalabut. Si Jose nagahulagway sa paagi nga ang Ginoong Jesus gitagad sa Iyang katawhan, ang mga Judeo, sa dihang Siya mipuyo dinhi sa kalibutan.

Si Israel nahigugma kang Jose labaw sa tanang niyang mga anak, tungod kay si Jose anak niya sa iyang pagkatigulang; ug iyang gibuhatan siya ug usa ka sinina nga may nagkalain-laing bulok. Ang iyang mga igsoon nakasabut nga gihigugma siya sa ilang amahan labaw pa kay kanila, mao nga naligutgot sila kaniya ug wala silay maayong pagtagad kaniya. Unya si Jose nagadamgo, iya kining gisaysay ngadto sa iyang mga igsoon; ug misamot ang ilang kasilag kaniya, Genesis 37:3-5.

Usa ka adlaw, ang iyang mga igsoon miadto sa pagpasibsib sa mga kahayupan sa ilang amahan didto sa Sekem. Si Israel mipadala ni Jose sa maong dapit aron susihon kon naunsa na ang iyang mga igsoon ug ang kahayupan. Si Jose miadto ngadto sa iyang mga igsoon ug nakaplagan niya sila sa Dotan. Sa dihang nakita siya sa iyang mga igsoon sa halayo ug sa wala pa siya makaabut duol kanila, sila nagaplano nga ilang patyon siya. Apan si Ruben, ang kamagulangan nga anak ni Israel, miluwas kang Jose gikan sa ilang mga kamot ug misugyot nga ila na lang siyang ihulog sa gahong nga walay tubig. Ug mao kadto ang ilang gibuhat.

Samtang nangaon sila, ilang nakita ang mga magpapatigayon nga nagpaingon sa Egipto. Sa sugyot ni Judah, sila mihukom nga ilang ibaligya si Jose sa kantidad nga baynte (20) ka piraso nga pilak sa salapi ngadto sa mga magpapatigayon. Si Ruben wala diha sa maong panghitabo ug siya nasuko sa dihang nakita niya nga si Jose wala na didto sa gahong. Aduna unta siyay tinguha sa pagluwas kang Jose gikan sa mga kamot sa iyang mga igsoon aron ibalik siya sa ilang amahan. Siya ming-ingon sa iyang mga igsoon, “Ang bata wala na didto alang kanako, asa man ako moadto?” Ug ilang gikuha ang sinina ni Jose nga may nagkalain-laing bulok, nag-ihaw sila ug laki nga kanding ug ilang gituslob ang sinina diha sa dugo. Ug kini ilang gidala ngadto sa ilang amahan ug miingon sila nga ang sinina ilang nakaplagan.

Si Israel nakaila sa sinina ug miingon nga si Jose gayud gipatay sa usa ka mapintas nga mananap. Ug siya misalikway sa ilang paglipay kaniya ug mihilak, Genesis 37:12-35.

Didto sa Egipto, ang mga magpapatigayon mibaligya kang Jose ngadto kang Potiphar, ang opisyal ni Paraon, ang kapitan sa mga magbalantay. Ang Dios nagauban kang Jose, busa nahimo siyang tagdumala sa panimalay ni Potiphar. Apan didto ang sala sa pangibog miabut sa diha nga ang asawa ni Potiphar misulay sa pagtintal kaniya. Sa dihang iyang gilikayan ang babaye, siya gipasanginlan niini ug misulti sa iyang bana ug si Jose nabilanggo.

Apan ang Dios nagauban kang Jose ug gikahimut-an siya sa panan-aw sa pangulong magbalantay. Ang pangulong magbalantay mihatag kang Jose sa pagbulot-an sa tanang mga binilanggo. Unya ang tigdala sa ilimnon ug ang tigluto sa tinapay sa hari, nabilanggo; pareha sila nga nagadamgo. Ug gihubad ni Jose ang ilang mga damgo ug giingnan sila nga sulod sa tulo (3) kaadlaw, ang tigdala sa ilimnon sa hari makabalik sa iyang trabaho; apan ang tigluto sa tinapay mamatay. Ang damgo nahimong tinuod, apan si Jose nakalimtan sa tigdala sa ilimnon sa hari.


Usa ka adlaw, si Paraon nagadamgo ug duha (2) ka damgo. Walay bisan usa (1) sa mga salamangkero sa Egipto ug ang tanang maalam nga mga tawo nga nakahubad niini. Unya ang tigdala sa ilimnon sa hari misulti ni Paraon mahitungod kang Jose, ug busa gipatawag kini sa hari. Si Jose miadto ug iyang gihubad ang damgo nga ang Dios nagapahibalo ni Paraon diha sa iyang mga damgo unsa ang iyang pagabuhaton; adunay pito (7) katuig nga dagaya ang ani, ug pito (7) katuig nga grabe ang gutom. Si Jose misugyot sa pagtigum ug pagkaon aron sa pagpangandam sa pito (7) katuig nga gutom. Karon ang sugyot nauyonan ni Paraon, ug sa tanang niyang mga alagad.

Busa si Paraon misulti kang Jose, “Tungod kay ang Dios nagapahibalo kanimo niining tanan, wala nay laing tawo nga nakahibalo ug maalam pa gawas kanimo. Ikaw mahimong ibabaw sa akong balay ug sumala sa imong sugo ang tanan nakong katawhan magayukbo; diha lamang sa trono ako labaw kay kanimo.” Si Paraon mipahimutang kang Jose, kinsa nagpangidaron ug traynta (30) sa dihang mitindog sa atubangan sa hari, sa tibuok yuta sa Egipto ug gihinganlan siya nga Zaphenath-paneah.

Sa diha nga ang pito (7) katuig sa kadagaya nga nahitabo sa yuta sa Egipto miabut na sa katapusan, adunay dakung gutom sa tibuok nga mga yuta, apan didto sa Egipto adunay daghang pagkaon. Ug unya, ang napulo (10) ka mga igsoon ni Jose milugsong aron mopalit ug pagkaon sa Egipto. Karon si Jose mao ang gobernador sa tibuok yuta. Siya ang nagabaligya ngadto sa tanang mga tawo sa yuta. Ug ang mga igsoon ni Jose miabut ug miyukbo kaniya. Sila wala makaila kang Jose, apan si Jose nakaila kanila. Iyang gisulayan ang iyang mga igsoon sa pagsusi kon ang ilang kasingkasing nausab na ba, sukad siya ilang gibaligya.

Kapitulo 42-44 sa Genesis, nagahisgut niining mga pagsulay nga gibuhat ni Jose ngadto sa iyang mga igsoon. Sila napamatud-an nga matitud-anon sila nga naghinulsol. Unya mipaila sa iyang kaugalingon si Jose ngadto sa iyang mga igsoon. Atong mahunahuna ang paghinilakay ug panagkalipay sa dihang nahibaloan nila nga siya mao ang ilang igsoon! Si Jose wala magaila sa iyang mga igsoon ingon nga kaaway, tungod sa iyang panglantaw. Pinaagi sa pag-ingon, “Dili kamo ang nagpadala kanako dinhi, apan ang Dios; ug Siya mao ang naghimo kanako nga amahan ni Paraon ug ginoo sa tibuok niya nga panimalay ug tagdumala sa tibuok yuta sa Egipto.” Si Jose nagapakita nga siya usa ka tawo nga naghimo sa iyang kinabuhi diha sa balaanong panglantaw, Genesis 45:8.

Si Jose mipadala ug mensahe sa iyang amahan sa pagdapit ug pagdala sa tibuok pamilya aron mopuyo sa yuta sa Egipto. Ang Dios misaad sa pagpanalangin ni Israel didto sa Egipto ug sa pagdala pag-usab sa iyang mga kaliwatan, Genesis 46:3-4.



Tinubdan: Sweet Publishing – kini ilustrasyon lamang sa Genesis 42:6

Karon atong pagatan-awon pinaagi sa teleskopyo ang halayo nga unahan. Sa unsang mga paagi nga ang mga kasinatian sa kinabuhi ni Jose pareha sa kasinatian ni Jesus?

1. Pareha silang mga anak nga hinigugma. Mateo 3:17
2. Pareha silang matinumanon sa kabubut-on sa amahan. Juan 8:29
3. Pareha silang nagsul-ob ug mabulokon nga sinina. Juan 19:23
4. Pareha silang gikaligutgotan nga walay hinungdan. Juan 15:25
5. Pareha silang wala dawata sa ilang kaugalingong katawhan. Juan 1:11
6. Pareha silang gitugyan tungod sa kapirasong salapi. Mateo 26:15
7. Pareha silang gitintal. Mateo 4:3
8. Pareha silang giakusahan ug bakak. Mateo 26:60
9. Pareha silang gitamay; usa nawala, usa naluwas. Lukas 23:32
10. Pareha silang nagtuman ug gibayaw. Filipos 2:8-11
11. Pareha silang nag-edad ug traynta (30) dihang nakadawat ug gahum. Lukas 3:23
12. Pareha silang gipasidunggan sa ilang mga igsoon. Zacarias 12:10

Si Israel ug si Jose parehong namatay didto sa Egipto, apan nangamatay sila nga adunay paglaum. Si Jose miingon sa iyang mga igsoon, “Ako karon hapit na mamatay, apan ang Dios magaatiman gayud kaninyo ug magadala kaninyo gikan niining yutaa ngadto sa yuta nga Iyang gisaad pinaagi sa panumpa ngadto kang Abraham, ngadto kang Isaac, ug ngadto kang Jacob,” Genesis 50:24. Ang Dios nga naggiya diha sa DALAN SA SAAD dili gayud magbakak ug dili gayud makalimut sa Iyang mga saad.

Kining kahibulongan nga Dios imo ba Siya nga Dios? Mahimo kana kon ikaw mosalig sa Iyang Anak, ang Ginoong Jesu-Cristo, ingon nga imong kaugalingong Manluluwas gikan sa impiyerno. Diha Kaniya, Siya magahatag kanimo sa Iyang pagkamatarung ug ang Iyang kahimayaan, Roma 8:28-32.

SAG-ULOHON NGA BERSIKULO:

“Siya nga wala magpahigawas sa Iyang kaugalingong Anak kondili mitugyan hinoon Kaniya alang kanatong tanan, dili ba ihatag usab Niya kanato ang tanang mga butang uban Kaniya?” Roma 8:32.

PAGTULON-AN 9 – BULOHATON

Direksyon: Imong makita nga gilista sa ubos ang siyam (9) ka mga pahayag mahitungod sa atong Ginoong Jesu-Cristo. Ilalum sa matag pahayag, ibutang ang kamatuoran nga nagahisgut ni Jose sa samang paagi.

1. Ang Ginoong Jesu-Cristo mao ang pinalanggang Anak sa Dios, ang Amahan. Mateo 3:17.
Si Jose mao ang pinalanggang anak ni _____ . Genesis 37:3.
2. Si Jesus gikaligutgotan nga walay hinungdan. Juan 15:25
Si Jose _____ . Genesis 37:5, 11.
3. Si Jesus wala dawata sa Iyang kaugalingong katawhan, ang mga Judeo. Juan 1:11
Si Jose wala dawata sa _____ . Genesis 37:18.
4. Si Jesus gibaligya sa katloan (30) kabuok nga salapi. Mateo 26:15
Si Jose gibaligya sa _____ . Genesis 37:28.
5. Si Jesus gitintal aron makasala pinaagi sa yawa. Mateo 4:3
Si Jose gitintal aron makasala pinaagi sa _____ .
Genesis 39:7.
6. Si Jesus giakusahan sa bakak pinaagi sa mga mini nga mga saksi. Mateo 26:60
Si Jose giakusahan sa bakak pinaagi sa _____ . Genesis 39:17,18.
7. Si Jesus adunay duha (2) nga kauban sa gipakaulawan Siya, ang usang kawatan ug nalaglag, ang usa naluwas. Lukas 23:32
Si Jose adunay duha (2) ka kauban diha sa _____

Genesis 40:1-3.
8. Si Jesus moluwas sa mga tawo gikan sa walay katapusang kamatayon ngadto sa walay katapusang kinabuhi. Romans 10:9
Si Jose nagaluwas sa mga tawo gikan sa _____
_____. Genesis 41:56,57.
9. Si Jesus sa umalabut nga panahon pagapasidunggan sa Iyang mga igsoon, ang mga Judeo, ug magahari ibabaw kanila. Zacarias 12:10
Si Jose gipasidunggan sa _____ . Genesis 45:26.
10. Isulat ang Roma 8:32: _____

